

四庫全書

史部

欽定四庫全書

史部

硃批諭旨卷六十中

臣 永 璿 恭 校

編 修 臣 義 謙 覆 勘

總校官中書臣朱 鈐

校對官中書臣高 中

謄錄監生臣王爾熙

欽定四庫全書

硃批諭旨卷六十中

硃批王國棟奏摺

湖南巡撫臣王國棟謹

奏為州縣人才難得仰懇

聖恩准予開復事竊湖南前撫臣王之樞派徵長沙等

縣減則銀兩案内解任之龍陽知縣劉鐸安鄉知

縣趙琳澧州知州黃炎又來楚質審之醴陵縣丁

憂知縣袁振緒經前撫臣布蘭泰審明並非私自
勒派

題請開復部覆以各員所解徵收銀兩現在著落王
之樞等名下嚴催完補況同案之張琳現於王之
樞本案互揭革職質審均難遽准開復應俟王之
樞等銀有無完報並互揭之案審結具

題到日再議臣思州縣減則之案業已審結所解減
則銀兩又已奉

旨著落王之樞等追補似與伊等無干至張楫互揭之
案更與減則無涉臣見劉鐸趙琳黃炎袁振緒等
俱諳練民事熟悉湖南風土經臣委勘茶陵攸縣
鄱縣安仁等處未經復則田畝頗能小心承辦清
釐有法復委協辦湘陰華容安鄉堤工亦俱實心
料理臣思州縣人才難得伊等尚屬可用可否准
其開復留楚效用俟有緊要州縣缺出容臣各照
原銜酌量

題補給咨赴部引

見此皆出自

皇上天恩倘蒙

俞允當即會同督臣邁柱具

題謹

奏

如此方是賢員理應愛惜具疏題請開復可也

湖南巡撫臣王國棟謹

奏為請

旨事湖南復則田地一案臣查得辰州府屬沅陵辰谿
黔陽三縣界接苗徭在萬山之中土壤磽瘠與別
府州縣之平疇沃野迥異而沅陵一縣田畝六升
三合起科地畝三升四合起科較之各州縣田地
塘糧每畝不過一二三四升起科者實又偏重今
據司詳辰州知府汪立名遍加履勘曉以

皇上愛民之仁三縣民屯士庶踴躍趨赴自願陞科認

復原則紛紛求請於雍正六年起徵輸納臣查各
該縣復則田地例應於雍正三年復則起徵計應
補三年陞科糧共銀一萬四千八十餘兩但三縣
俱係瘠薄之區收穫無幾欲將三年陞科糧與當
年之原額及新陞錢糧一併催徵恐敲朴徒加民
力終難輸納查雍正五年五月十五日欽奉

上諭各省向來之地畝隱匿未報者准官民自行出首
將從前侵隱之罪悉從寬免其未納之錢糧亦不復

追問定限一年令其首報統於雍正七年入額解徵
等因欽遵在案今三縣既認復則所有雍正三四
五等年陞科糧可否概行寬免准其雍正六年起
徵出自

皇上天恩為此繕摺請

旨批示以便繕疏具

題謹

奏

自然應從雍正六年起徵卽照此具疏題奏可也

又所奏嚴定處分一摺現發部議候旨遵行

湖南巡撫臣王國棟謹

奏為敬覆

諭旨事竊桑植保靖二司土衆感悅歸誠土司遵法繳

印臣業經會同署督臣福敏

題報在案其遵

旨調度事宜相應奏

間臣先檄飭新授副將楊凱會同同知鐵顯祖領兵進
桑植駐防復酌用鎮筸鎮遊擊王進昌會同同知
劉自唐領兵進保靖駐防臣隨出示宣揚

聖德委曲曉諭去後土民叩頭感泣土司繳印并有喇
布神旗各土人隨印出來叩頭投誠目下正商建
置營署兵房添設弁員抽調卒伍一應善後之策
并商安插土司之處會同酌妥再行

題奏又乾州同知王柔詳稱鎮溪所十里版圖六里

為土苗所占一事臣欽奉

皇上硃批跪讀之下仰見我

皇上睿慮精詳包容廣大視四海猶一家地何分於內

外臣謹遵

聖訓撫綏苗民輯寧邊徼總在使之相安諸凡不敢冒
昧但六里土苗及紅苗之事王柔言之鑿鑿渠為
人雖覺粗率然熟諳苗疆辦事勤敏今因遵

旨迎請

龍神已委王柔來京虔請於王柔引

見時

皇上詢其情形悉知原委合併

奏明謹

奏

欣悅覽之應須料理一勞永逸之事斷然不宜畏難但
不可好大喜功濫及無辜

湖廣巡撫臣王國棟謹

奏為奏明事竊湖南永州府寧遠縣生員荆之寶家
於雍正六年二月初一日夜被刦一案經臣嚴飭
各汛弁兵協力會擒獲得賊黨年亞孫一名嚴訊
供稱賊首廖老四等係廣東連州人關文密拏前
已

奏明在案臣又訪知二月十八日永州鎮標左營遊
擊楊京瑛同把總王俊侯進山追擒不識路徑反
被賊捉放回猖獗已極臣又陸續嚴飭文武官弁

設法擒拏務期全獲茲於四月二十二日准永州等處總兵官楊國相移咨四月十六日據遊擊楊京瑛呈稱行劫荆家賊夥當即四路懸立賞格訪查嚴緝據江華縣民鳳成偉等稟稱深知此案賊犯來歷住居廣西賀縣等處地方情願報效前往緝拏等情隨挑選健兵十名令把總周永安帶領魚同鳳成偉等前赴賀縣密緝於四月初九日拏獲賊犯潘文德方應隆二名解送寧遠縣署縣蔣

德重嚴訊二犯供出夥盜黎青奇等八人俱係賀縣人今仍委把總周永安帶兵與鳳成偉等協同縣差到廣西賀縣一帶地方照依縣審姓名年貌住址闕文廣西賀縣文武嚴拏各犯等情前來據此所有本標遊擊楊京瑛所拏賊犯姓名并闕拏各犯原由理合呈報等因到臣臣已飛飭署寧遠縣蔣德重俟夥賊緝獲到日審明速報外謹先繕摺

奏明謹

奏

覽

據孔毓珣奏聞於廣東地方亦擒獲數名矣此等匪類
不法已極當盡法究處不可稍涉姑息

湖南巡撫臣王國棟謹

奏為覆

旨事竊四月二十一日臣標把總恭捧

皇上硃批奏摺到長沙臣伏讀

硃批謹遵

諭旨凡嚴查屬員懲治民俗之處當益加留心實力整

飭仰副

聖懷再辰沅靖道王柔迎請

龍神於五月初二日到長沙臣已建設祠宇誠敬供

奉

皇上愛民重農建立

先農壇行耕藉禮今復虔造各省

龍神像位為民祈福一誠所感通於神明目下湖南
雨暘時若插蒔已畢四望田禾芄芄遍野從此

國家歲逢大有農民屢慶豐年

龍神之福

國佑民皆

皇上之格

天感召也近日湖南各府米價比去冬每石減去一錢上

下不等合併奏

聞謹

奏

禾稼秀而未實年歲尚未可定何遽云從此歲逢大有等語朕竄不喜此等虛誕無益之言豈我君臣以一誠對越神明祈

天垂佑之心乎况朕屢降諭旨甚明雨暘之應實關汝等督撫之公私誠僞用得其人即朕之所以體

天宣化若用非其人朕有何術以感召之耶湖廣米價從未聞如此之昂今不過稍為平減正我君臣夙夜修省憂勞思過之際乃出斯大言毫無敬慎之誠似此漫忽居心朕實不取汝等身任封疆一不存為臣不易之心必至於喪失身家而後已也看此光景初志已移大非田文鏡李衛之居心行事矣敬之慎之

湖南巡撫臣王國棟謹

奏為奏

聞事竊查湖南巡撫標下左右兩營兵丁內向有空糧
四十名係撫臣家丁充當前撫臣趙申喬止留二
十名以二十名歸營募補歷任相沿至臣莅任後
雖照舊開支其應領銀米仍貯該營以充火藥等
公項之用但臣撫標兵丁均闕營制所有家丁名
糧二十名未知前任撫臣曾經

奏明與否茲准署提臣劉世明咨商永順保靖桑植
三處地方需兵彈壓添設營制不敷兵丁議於通

省各營抽調併臣標抽撥二十名臣現檄飭中軍
遊擊等將家丁糧二十名內募補十名以足抽調
之數其餘十名糧餉於左右兩營內各存五分以
備火藥軍器等項之費理合據實奏

聞謹

奏

此事布蘭泰亦經奏過汝酌量行之

湖南巡撫臣王國棟謹

奏為恭報湖南雨水情形及早稻收成分數仰祈

睿鑒事竊惟楚南地方自本年春夏以來雨暘時若二
麥豐收惟五月十八日以後至六月初旬據辰永
等屬陸續具報得雨而長沙府城雨澤稍有愆期
臣即於六月初六日率同合屬文武各官於

敕建龍神廟虔誠祈禱臣因查勘堤工於初九日自長
沙起程初十日行至湘陰縣本日暨十一日連得
甘雨續據布政司趙城飛報長沙府城同日得雨

并據岳常等府呈報亦皆陸續得雨十八日臣查

堤至常德府龍陽縣地方又得甘雨二十二日至

常德府城本日大沛甘霖四野田疇霑足小民莫

朕最

不喜此

等套語汝

等若不能秉公體國實心任事

不權呼載道感頌

袒護

所私沽名釣譽

不務安民輯兵而惟朕之洪福是

聖主洪福現在湖南各屬早稻俱已刈獲據報收成約

倚試

問朕

偏從何來

有七八九分不等晚稻今已得雨亦可冀望有收

除各屬得雨有無霑足之處容臣查確另報外謹

先將六月分雨水情形及早稻收成分數據實奏

聞謹

奏

覽

湖南巡撫臣王國棟謹

奏為奏

聞事雍正六年二月十三日湖廣鎮筵總兵署九谿協
副將印務周一德具詳二月十三日據下筒長官
司向鼎晟呈稱竊照卑職下筒長官司創設始於

唐宋相傳千有餘年屬九谿衛管轄輸納錢糧世受

國恩謹守忠順今逢我

皇上恩及苗疆澤流邊遠桑植保靖俱准改土歸流土
衆得以安居樂業共享昇平隣近土司莫不欣欣
向化是以永順亦請改流竊思桑植保靖原因獲
罪改流至於永順土司實心向化之處所當效法
今卑職擇善而從自願改流永為

聖朝赤子以盡効順之誠但念卑職祖居邊徼世為土人實無原籍可歸伏懇轉詳

題達改流并求憫念窮員向化之志仍守祖宗廬墓不令遷徙異土再查卑職彈丸邊鄙幅幘甚小烟戶無多向因隣司兵擾逃亡殆盡現僅存一百一十一戶仍請屬九谿衛就近管轄輸納錢糧等語又據副將楊凱同知鐵顯祖報同前由臣思下崗長官司向鼎晟世襲土職謹守忠順今自願效法

永順改土歸流將所轄四至地界戶口冊造齎前來願入九谿衛管轄輸納錢糧求勿遷徙臣見情詞懇摯出於至誠現在批行藩臬兩司妥議具詳會同督臣邁柱另疏具

題外謹先繕摺奏

聞謹

奏

覽奏已悉但土官若盡令改流殊不勝其繁已命怡親

王轉傳密諭令汝等詳細斟酌旨到時爾與邁柱悉心籌畫奏聞朕閱疏後再行批諭

湖南巡撫臣王國棟謹

奏為奏明倉穀事湖南各府屬常平倉積貯穀石臣於上年各屬減糶之後即飭買補并委員遞盤如果存糶穀石顆粒無虧即出具實貯印結詳報一或缺少該員隨盤隨揭臣即指名

題叅前已

奏明但臣查長沙巴陵武陵等十三州縣衛於雍正
五年夏被水災經前署撫臣布蘭泰先於司庫公
項內動用散給又復借用各被水州縣衛存貯倉
穀共二萬八千六百石委員賑濟此項穀石係布
蘭泰仰體

皇仁一時從權動用未經

題明旋率司道府各捐銀買補還項每石議價三錢
五分飭發買補上年湖南被水穀價騰貴不敢採

買除益陽巴陵武陵沅江九谿永定具報買完外
尚有長沙湘陰澧州安鄉龍陽華容岳州衛等州
縣衛無力賠墊一時不能買足臣思此項係借用
穀石非同別府州縣春夏減糶秋冬買補一有違
限當即

是

題叅之比今將各州縣衛未買穀石現檄飭作速購
買如數貯倉毋許遲延致干叅處但臣念前署撫
臣布蘭泰發價之後正署迭更又遇歲歉穀貴三

錢五分原不敷買臣查有實係無力不能賠補者
可否於司庫三分耗羨內酌給添補速買貯倉或
寬期至秋成穀賤之時令其補足再有違誤立即
題叅此出自

皇上天恩伏乞

睿鑑批示施行謹

奏

寬至秋成買補為是湖廣穀石較之他省猶易於措置

惟當以懲治刁悍習俗振刷屬員因循為要務也

湖南巡撫臣王國棟謹

奏為奏明事竊湖南桑植地方甫經改流

皇上憐憫苗民向受土司殘害設立文武各官撫綏彈壓副將楊凱先由遊擊超擢辰州副將以其熟諳苗務

特恩調補桑植岳州府額外同知鐵顯祖係減則案內
呈誤知縣亦為其熟悉苗情破格擢用此二員者

自當文武和衷恩撫土民輯寧苗地方不負

皇上任使隆恩乃文武不睦動輒齟齬同知鐵顯祖科
派擾民先據楊凱將伊劣蹟稟報臣亦密訪得實
隨會同督臣邁柱

題叅在案但臣又訪知楊凱莅任以來不能鈴束兵
此二人辜恩自棄甚屬可惡已有旨矣丁每事寬縱致擾居民臣已札致督臣提臣其楊

凱居官之處自必查核確實具

奏再湖南軍政冊開造標下左右兩營遊擊等官履

歷內有右營遊擊郭永祚年七十四歲例應填註
年老之員臣查郭永祚履歷於雍正二年引

見時年已七十蒙

皇上天恩念伊係曾效力之人由千總掣廣西守備

特放湖南遊擊早在

皇上洞鑒之中臣見其精力尚健整飭營伍尚無貽誤
此所奏甚是但老健即同春寒秋熱必不能久覺其精

令其照舊供職合併奏

力少衰艱於供職時令伊自請休致可也
聞謹

奏

覽

湖南巡撫

臣

王國棟謹

奏為奏明事竊雍正六年七月初二日據永州永明縣署縣吳璠詳稱永明縣扶靈徭素產杉枋徭人逐年斫伐堆積山谿兩岸本年四月內溪水暴漲漂流而下有附近徭地之規頭村居民以為無主之物任意撈取孰意徭人跟蹤尋至村民不還當

即捉人復於五月內統衆肆橫到村搶去耕牛大小二百餘隻隨經追出人口給還杉枋先委桃川市巡檢入徭追取牛隻徭人抗不服追卑職又親詣扶靈徭地方委曲勸諭令其出質徭人竟堅不退牛抗不赴質伏乞嚴批究治等語臣屢經飭行該府縣開誠曉示徭人秉公推鞠究擬招解去後續於八月二十七日復據永州府轉據新任永明縣知縣何鉉詳稱七月二十四日扶靈徭人復統

衆捉去村民周正翟許仔搶去牛一隻割去禾豆
等物八月初九日又統衆潛伏傷死在地摘棉花
之毛端若在田割禾之毛舉仔等情永州鎮臣邊
士偉亦同日咨同前由臣思此案徭人雖因撈木
起釁但已經給還杉木縣令又復親詣面諭乃其
兇惡至此或者其中別有隱情亦未可定臣現檄
委永州知府親詣該地會同鎮臣先出示明白曉
諭宣布

皇上德威民獠均係

朝廷赤子並無岐視化導民獠兩造出質以息爭端究
擬傷人獠頭以為獠人肆橫之戒倘仍負固不服
自應臨以兵威臣與督提二臣另行商酌請
旨遵行謹將扶靈獠情形據實

奏明伏乞

睿鑒謹

奏

此等苗猺與禽獸何殊必至萬不可恕時相機舉行猶當慎重近日以來各省整理番苗猺猺之事稍覺過多可緩者應徐徐圖之如王柔急公效力之心雖切恐或涉於孟浪諸凡必詳加審度可保萬全者一舉而加諸彼方克奏效若大費經營未能徹始徹終洞悉之事且靜以待之為是慎之毋忽

湖南巡撫臣王國棟謹

奏為奏明事竊惟保靖桑植永順三土司奉

旨先後改流其作何分建州縣一切善後事宜現在會同督臣熟商經理惟三土司地土頗廣輸納無多自宜通行查丈以清

國課第從前田地類多土民瓜分耕種甘受土司苛派並不按畝陞科相沿已久安之若素化導改革似當以漸始為安妥前據原任桑植同知鐵顯祖現任辰沅靖道王柔先後詳請清丈經臣會商督臣及密詢該管文武皆以寬期為便除經密飭王

汝二

柔暫緩丈量俟設官定制之後再行設法清丈外

微有

不清之處有何干礙王柔等所見淺矣

所有各該土司地方寬期丈量之處合先奏

聞再桑植永順地方前偶有時疫自交八月以後疫氣
漸消人民現已平復又湖南各府早稻收成前已
奏明茲查中晚二稻收成計六七八九分不等現在
米價每石七八九錢不等合併奏

聞謹

奏

知道了

湖南巡撫臣王國棟謹

奏為請

旨事竊查湖南各屬依山傍湖田地欺隱較之他省更難查察現在屬員中之實力開導者固有而愚民貪利始終欺隱者難保其必無若通行清丈苟不得其人不得其法反致滋擾臣身任封疆又不能親歷查察必得熟悉風土才具優長之員委令抽

魯之數處懲治一二庶姦頑知倣而弊端可絕前河

可知矣南巡察陞任廣西按察使臣張元懷道過長沙面

設不能言河南署嵩縣知縣曾之裕曾在原任湖南撫臣

尋覓魏廷珍署中辦事欺隱弊端素所熟悉臣雖未識

幾何其人但張元懷為人明慎所言必非無據臣謹仰

懇

乃信之太過歟且現任屬員之黜陟考成在爾若無術

聖恩可否將該員使之感恩趨赴即魯之裕到楚亦不過如此而已何益

命來湖南量才委用如各屬詳報有無欺隱田糧之處

之有不能深信者與之商酌委員查丈或即令該員前
員皆視上司之精神本領何如而各效心力現在者既
不能勸導俾其無狀則他省效力之員遇上司更易亦
必隨所遇而遷移其志如此則好員反為所誤豈不可
惜耶

浙奉

命巡撫湖南適該員告假回籍暫令隨至楚中再往豫
省數月以來該員諸事歷練勤慎無悞但係河工
效力人員近奉

諭旨查家道殷實艱窘之處理應回籍取結臣因其才
果係好員河工緊要不應請留若不過庸平之才又何
猷敏練暫留臣處以備臂指之用抑或將來於查
必請留汝等督撫似此違例奏請人員甚屬不協朕近
日有特頒諭旨爾一見即知矣
伏候

皇上批示欽遵謹

奏

但將現在屬員鼓舞勸懲使人人皆知奮勉循分盡職
此為根本良策若欲於他處旁求俊彥恐未必得遇出

衆之才而徒寒閩省屬員之心羣指所用之人為私人
所得不償所失矣

湖南巡撫臣王國棟謹

奏為覆

旨事雍正六年四月初三日接辰沅靖道王柔武昌封
發密稟內云職道於二月十三日面奉

上諭原任湖南辰州府知府遲煊貪贓不法歷辰州二
十餘年欺隱闕稅贏餘銀十萬餘兩罰伊修城效力

伊乃不知愧悔感恩並不實心效力近訪此項欺隱
稅課銀兩係伊管事家人杜大杜二李大李二并管
關書辦張壽元張國寶等俱從中侵蝕其張壽元張
國寶現在居住辰州著巡撫王國棟查追欽此臣立
行按察使并飭辰州府知府密拏嚴訊去後茲據
辰州府詳稱已將張壽元張國寶密拏到案一面
將伊住宅家資點明封固交貯沅陵縣庫外卑府
隨嚴加究訊張壽元張國寶堅供壽元國寶雖係

遲端點管木稅不過算數掛號填票其稅銀有遲
三公子同內史李大查收壽元國寶等在關每木
一排止得銀五分為衆人飯食紙筆之費此外毫
無侵肥亦並無窩隱遲端財產之處嚴詰不移除
現封房產資物此外無有財產再飭沅陵縣詳查
另報等語臣以張壽元張國寶既於遲端任內經
管關稅現在搜查家產無幾必有侵匿窩隱之處
未便任其狡賴復專委辰沅靖道王柔提犯審追

并密飭辰州常德二府遍加訪查毋致纖毫隱匿
俟王柔審明覆到另疏具

題為此繕摺謹

奏

此事爾不親行審究而欲推諉於王柔希朕信而不疑
大謬矣朕不能信王柔如汝信張元懷之真切也

湖南巡撫臣王國棟謹

奏為奏明驛站夫役事竊臣據驛鹽糧儲道楊秘詳

稱湖南各州縣驛額設夫役二千八百名奉部行
令裁減二百名又平清二衛共夫一百五十名歸
併黔省管理通省共存額夫二千四百四十五名
現今長養在站聽差但定例雖令長養查各州縣
驛實係臨時雇覓蓋差使之來原無一定一遇餉
鞘等項大差來到需用夫役動輒二三百名額夫
既不敷用差使又難遲悞若非平時酌省無項應
付所以湖南各州縣驛之有夫役者按夫之多寡

俱設立夫頭三四五名不等長養在站遇有差使
用夫若干名夫頭即往四鄉臨時雇覓將平日不
長養之夫價以補大差之不足但既不長養則應
付日少空曠日多額領銀兩不無贏餘侵蝕若徑
行請裁恐額夫過少未免貽悞本道職司郵務若
隱而不言難免欺誑之罪今謬加酌議凡各州縣
驛按季發給本道印冊一本凡有勘合火牌及定
例當應付者將逐日應付過某項差使夫役若干

給價若干一一填註冊內不使少有浮冒每季終
合州縣齎送核査俟一年期滿通計應付夫役工
食若干節省銀兩若干詳請

題達庶錢糧可免侵蝕而驛務亦無廢弛等語到臣

臣查驛站夫役屢經九卿會議差使紛紜之處聽
其照舊設立其偏僻驛遞酌量議減然均難裁汰
奉

旨依議欽遵在案今據楊秘詳稱驛站夫役俱係臨期

雇募乃湖廣實在情形為節省經費起見臣思額設夫役既屬虛名而夫役工食

國家錢糧所關豈容虛冒臣謹據實

奏明或照舊遵行或飭令該道試行一年看每年節省若干并有無誤公累民之處臣再行詳議具

題伏祈

睿鑒批示謹

奏

爾不能定之事請朕批示朕在數千里外從未身經目睹何以遽定其是否耶百凡總須秉公除私竭力辦理期當於理而已似此事事猶豫動輒請旨將來脫有貽誤至不妥協時豈欲以曾經請旨四字卸己之過乎於此觀之為一身利害之念重為國家效忠之志輕矣亟當改心易慮效法李衛田文鏡為要失之毫釐則差之千里審之戒之

湖南巡撫臣王國棟謹

奏為奏

聞事湖南辰州府黔陽縣叅革知縣武弘登捏報老婦
絹綿米肉折價銀兩俱無領狀一案有署黔陽縣
事淑浦縣知縣吳大燁因不先行首出經臣附叅
接准部咨革職但吳大燁居官聲名頗好據司道
府俱稱該員才守兼優實為辰屬第一好官臣查
淑浦係苗疆要缺吳大燁莅任四載並無重大案
件則該員猶堪任使今以一青革職殊屬可惜臣

仰體

皇上聖心為人才難得起見伏懇

皇上將原任叙浦縣知縣吳大燁

勅部行文令臣給咨赴部引

見棄瑕錄用自必感戴

聖恩勤慎供職或可收一得之效皆出自

皇上天恩又寶慶府新寧縣知縣張人崧為人誠實謹

慎雖初任未經諳練而操守頗好甚得民心前因

盜案革職離任之日百姓奔走號呼如失父母今
蒙

皇上天恩令臣出具考語送部引

見倘蒙

聖鑒如其人尚可錄用請仍復補新寧則官民相安苗
疆要地甚有裨益矣理合一併

奏明伏惟

聖鑒謹

奏

照所奏已諭部矣保留人員若出於秉公為國惜才誠屬美舉乃朕之所望於卿等者若涉於私交市恩不但於義不合且恐為異日之累似此薦舉之員必須更加一番訪察少覺有不妥處切勿掩飾袒護如田文鏡李衛將所薦之人復行叅核者不一而足汝當法之蓋人原難保其始終不移也斷不可過於信人以自貽後悔須慎為之果能將好員一一獎勸保全其劣員不特貪

婪不法之輩即庸平不及者亦皆一一叅黜則郡縣俱
慶得人矣郡縣得人汝等豈不稍省心力乎能若此天
下何患不治兆民何患不安此一著認得真看得透必
秉公持正毫不為一身是非毀譽計毅然而行之大臣
方能之朕於是乎倚賴焉勉之

湖南巡撫

臣

王國棟謹

奏為請

旨事竊

臣

上年奉

命自浙赴湖南任道經長沙所屬之湘潭縣見千艘雲
集四方商賈輻輳數里市鎮堆積貨物懋遷有無
居民櫛比而長沙係省會之區府城又逼臨湘江
乃環顧江干無船停泊者蓋因湘潭江形稍曲北
風勢緩而長沙江面既寬北風勢緊又無小港可
以灣入猝然風起濤湧一時難禦沉溺漂沒者往
往而有此官民船隻不能停泊而商船亦多往湘
潭以舍湘潭無可棲泊處也即如江西之湖口關

先設湖口縣江水浩瀚商人上稅停舟常遭風濤

之險荷蒙

皇恩移駐九江則人稱便焉臣謹按長沙北門外原有
此河當再四詳慎考察因何淤塞至今不用若係日久
舊河一道計長三百餘丈淤塞已久若將此河照
不濬逐漸湮廢便極應行若恐引江水逼近或防大舟
舊開挖深濶可以多泊船隻誠為大便利於民之事
直抵城隍有意令淤則不當開切不可因目前之便而
不但往來官民船可以避險其駕小舟以謀生者
不究前人意之由益小損大徒費而遺患也至於工
料等費乃係細事不拘如何皆可凡此等更所改舊之
百工則財用足通百貨則生計饒即肩挑食力之

舉務須考之往古民有商貨來往上下可以幾行而不時若因一時擔負累亦貧民衣食

一邊所見或聽不達之人無稽泛論遂輕舉妄動鮮克之數也臣目擊地方情形而興工費財無項可抵

奏效

切記切記

今據驛鹽糧儲道楊秘詳稱本道荷蒙

皇上不次擢用由麗江府知府

楊秘可稱歷練老成祇慮其柔善邀譽見小取容非統

簡調湖南糧道

率屬員之大器若其潔已自守則綽然有餘可再四勗

聖恩優渥有加靡已惟有冰兢自勵勤慎急公以圖仰

勉勸導令伊效法田文鏡李衛之行爲但似此老於世

報萬一茲長岳常三府屬堤工欽奉

諭旨行令修築查本道衙門向有每年鹽規銀八千兩

故積習成性頑難改易試盡汝心策勵之可也

願以雍正五年現存銀八千兩並雍正六年所餘銀八千兩歲底彙齊共一萬六千兩作為修築堤工之用再查長沙為省會之地長江浩瀚竟無灣泊舟楫之所北門外有舊河一道俟雍正七年分所餘八千兩解到之日可以開濬此河停泊船隻庶於地方民生不無小補其嗣後每年所餘八千兩俱存貯道庫以充公用擬合詳請俯賜核奪

奏明臣見楊秘情詞懇摯以雍正五年分規為修堤

之用而以雍正七年分規開濬河道與臣見適合
今估計工銀約費一萬四千有奇但事關為民興
利似不可緩據臣愚見或於秋冬興工應否先於
司庫正項內動用開濬俟雍正七年該道歸公銀
抵補伏乞

皇上睿鑒批示施行謹

奏

覽

湖南巡撫

臣

王國棟謹

奏為恭謝

天恩敬覆

諭旨事本年十月十九日

臣家人齋回

硃批奏摺并蒙

恩賜哈密瓜一簍

臣謹望

闕叩頭謝

恩祇領恭奉

皇上批發各摺

臣

當逐一欽遵次第辦理伏讀原奏扶

靈搖摺

御批仰見我

皇上天地之大無所不容日月之明無所不照

臣敢不

益加敬慎熟籌萬安查扶靈搖捉人潛匿一案今

據永州鎮

臣

邊士偉咨及知府姜邵湘文報已於

九月二十日誘出兇搖蔣滔仔等十三人被捉之

周正翟許仔二人久經放回各搖既悔罪出審似

當懲治兇首寬其餘黨以廣

皇仁至開闢六里一事宸沅靖道王柔於五月間恭捧硃批奏摺令該督撫詳悉商酌而行臣業經面商督臣

邁柱現委鎮筵鎮臣周一德確勘如果開墾之後可以裨益

國課綏靖苗疆萬全無患自當與督臣計議妥當

奏請

聖裁倘功效難必利害相半即當與督臣商酌停止另

行會

奏又臣所

奏開挖引河一事擬動司庫公項今奉

旨辦理軍務需用甚多自當分別緩急次第辦理請於

明歲秋冬舉行合併

奏明謹

奏

應辦理者亦不可畏難因循貽害養姦若好大喜功滋

生事端又非所取也

湖南巡撫臣王國棟謹

奏為敬覆

硃批諭旨事

臣於九月二十六日同督臣邁柱提臣劉

世明會審永州鎮臣楊國相在岳州舟次臣家人

恭捧

奏摺到岳臣跪接開讀內臣奏驛站一摺奉有

皇上硃批遵查此事經驛糧道楊秘通詳臣查閱前後

情節似屬可行但雍正三年內奉九卿會議有盡將人夫裁去現行雇募恐有累民悞差之事等語

臣未敢冒昧具

題致干部駁是以摺

奏今蒙

皇上訓誨周詳且近准部咨又令各省督撫將現在驛

站情形詳議臣已檄飭司道公同酌妥即行具

題又蒙

聖訓令臣效法田文鏡李衛二人欽此

臣

與田文鏡同

事二載李衛同事亦將一年其居心行事臣所深
悉又仰見

皇上加恩二臣至優極渥臣蒙

皇上高厚委任之恩雖至愚極昧斷未有舍榮而就辱
者但恐臣才庸識闇或有智力不及之處伏懇

聖恩時加訓誨臣力雖不足而心實有餘惟有一刻不
敢閒一事不敢懈一人不敢縱一字不敢欺殫竭

血誠以供職守而已臣臨

奏不勝悚息戰慄之至謹

奏

汝此任甚不及前二任或為智力所限或係改移心行
抑或被屬員之所愚而然均不可知要當竭力加勉不
欺不隱四字奉為指南

湖南巡撫臣王國棟謹

奏為敬覆

硃批諭旨事十一月二十四日臣標千總恭捧

批回奏摺至長沙臣隨跪接開讀臣所

奏覆

旨一摺奉到

皇上硃批臣蒙

聖恩擢用莅任一載有餘緣封疆任重夙夜兢兢惟以
仰體

聖心察吏安民為務方且謹之又謹曷敢有改移心行

之處但臣才識庸愚力量淺薄誠如

聖明睿照至

聖諭所云當竭力加勉不欺不隱四字奉為指南伏惟
皇上聰明睿哲天縱如神無隱不周無微不燭固非臣

下所得而欺而臣質本凡陋遭際

聖明亦惟以拳拳之念區區之誠上事

君父實無一事敢蹈欺隱者今蒙

聖慈訓諭臣惟有益加謹凜敬錄

聖訓銘諸座右朝夕瞻仰如對

天顏咫尺而已臣不勝戰慄恐懼之至謹

奏

巡撫一官原極繁難非勉能清慎勤三字便可謂勝任也用人雖不求備惟至督撫必須全才方不有所貽悞若無包羅通省之襟懷統馭羣僚之器量即為不稱厥職凡事當務大者遠者若只思就區區目前支吾以盡職任而已未有不顧此失彼跋前疐後者當努力勉一

大字

湖南巡撫

臣

王國棟謹

奏為奏

聞事竊照永州府寧遠縣失主荆之寶案內盜首七十

七糾率匪類為害地方斷難輕縱

臣欽遵

諭旨歷次移行嚴緝復大張曉諭凡能緝獲本犯者除

已經懸賞外

臣

又另懸重賞分委幹員往粵協緝

去後茲於十一月二十二日據永州府寧遠縣報

稱本月十五日接江華縣錦田司巡檢毛峻德自
廣東廣州府稟稱盜首七十七已於十月二十六
日會同四會縣把總典史在廣寧地方拿獲令帶
去識認之莫祥九認明的係七十七已解赴廣東
督臣衙門查訊等因轉報到臣除經飛咨廣東督
臣孔毓珣速將該犯嚴押來楚質訊是否確係盜
首另行請

旨正法外所有據報已獲盜首緣由理合具摺奏

聞謹

奏

聞各案業經捕獲之盜多致逃脫且有越獄而逸者是
何理耶獲而復脫何如不捕似此徒貽笑於隣省耳

湖南巡撫臣王國棟謹

奏為敬覆

訓旨事本年十一月二十六日刑部左侍郎署吏部尚

書事臣杭奕祿奉

命至長沙

臣謹跪請

聖安杭奕祿隨口宣

皇上訓旨爾至湖南問王國棟伊在湖南一兩年如果
時常宣揚德化曉諭愚民如何有此等百姓想河南
必無此事令伊從此以後勉力改過自新留心地方
事務不時曉諭愚蒙稽查匪類等因欽此臣跪聆之
下悚慚無地伏念臣本愚賤謬任封疆楚南刁悍
習俗久荷

聖明洞鑒今乃有大逆不道之曾靜張熙出臣屬下臣

莅任一載有餘既不能化導於先又不能覺察於後負職之罪百喙難辭乃蒙我

皇上不加譴責格外優容復

諭旨部臣勉臣改過

天恩如此之高厚

訓誨如此其諄切臣惟有時刻凜遵

天語一念不敢懈弛一事不敢姑息殫心竭力化導整

頓以期仰報

殊恩於萬一耳除會訊逆賊供情及分咨各省提犯緣
由另行公同陳奏外所有微臣恭領

訓旨私心感激下情理合具摺謹

奏

身為大吏凡事當務遠大二字若不急所當務往往捨
大圖細而不知所貽悞者廣矣勉為之

刑部左侍郎

臣杭奕祿副都統

臣

海蘭湖南巡撫

臣王國棟謹

奏為恭報會訊逆賊供情并

呈逆書底稿仰祈

睿鑒事竊

臣

杭奕祿於十一月初三日奉

命出京至二十六日抵長沙府城恭述我

皇上天地之量堯舜之仁不以逆賊狂言少介

聖意并

命臣等平心靜氣窮究邪說所由來開導癡愚所未諭

務使折服認罪

臣海蘭

臣王國棟恭聆之下仰頌

聖德之淵涵益憤逆徒之妄誕

臣

等於長沙撫臣內署

提出曾靜將

聖天子孝敬慈惠恭儉文明與夫勵精圖治之實心愛

養斯民之實政逐一開示宣揚該犯諦聽良久乃

俯首認罪據云靜生居天末日坐井中造言誹謗

罪大惡極痛哭流涕叩頭不已

臣

等見其醉醒夢

覺然後將逆書所載逐條追究該犯茫無所指非

云齊東之語即云臆度之私詰問再四毫無風影
當給紙筆令該犯寫供謹將親筆供單進呈

御覽臣杭奕祿又會同追究其同謀黨羽據該犯堅供
當日遣張熙前去實係獨得之秘毅然而行既非
他人所能參贊亦不屑與聞於人且自以為成固
有利止亦無害故知幾錄內諄囑張熙一路訪問
如所聞與在家所傳不合即便回來另作主意不
可輕舉原非預有邀約謀定後行實無同黨有書

可證等語臣等會訊續獲之寧遠縣教諭劉之珩
陳立安併書內查出之曹珏廖易即景叔等皆供
不知投書情事即質之曾靜亦云伊等實不知情
伏查逆賊曾靜即夏靚生於山野不明大義因考
試五等遂喪心病狂借前人道學之皮毛以行其
無父無君之邪說復敢誣謗

聖主捏造逆書遣徒張熙即張倬又字敬卿帶同張勛
即實安齋往陝西希圖誘惑大臣濟其大逆誠為

罪惡滔天神人共憤臣等恪遵

訓旨平心細詢該犯自知誣妄不待刑加叩頭伏辜雖悔罪出於天良似類有苗之格而下民敢於罔上難逃大逆之誅宜置極刑以彰

國法同謀之張熙知情之張勘張新華以及緣坐人等律有明條均難輕縱至於曾靜行止乖張久為鄉黨所不齒被其蠱惑信從者止有張熙等一二門人臣等細行查訪此外實無同夥黨羽其逆書

所載譙中翼嚴賡臣沈在寬車鼎豐車鼎賁孫克
用并書內查出毛儀施虹玉等據該犯堅稱皆係
背地推崇並未謀面之人等語臣等查閱知新錄
知幾錄內所載各條原無與衆人商謀字樣似非
全出狡飾再從前曾靜遣張熙往浙江訪求呂晚
村書時曾見呂晚村第九子呂無盡得伊綱目凡
例未發之蘊或彼此有所商謀亦未可定臣等現
在行提併要備忘錄呂子文集及綱目凡例未發

之蘊以便查閱所有曾靜逆書底稿及祭祖文稿
臣等謹公同封進仍望

皇上即賜發回容臣等細按追問以免遺漏除現在會
咨陝西江南浙江三省督臣提拏逆賊張熙并逆
書內一應有名人等到案質明另行分別律擬

奏請外所有臣杭奕祿到長沙會訊緣由及逆賊曾
靜供單并搜出曾靜大逆書三冊又所著小學開
蒙一冊扇一柄對聯一紙劉之珩書二冊譙中翼

詩稿一紙理合另匣一併奏

呈伏祈

睿鑒謹

奏

覽逆犯之供單更屬可笑人也另有諭旨從部頒發遵
諭將一起逆黨押解來京可也一路寬其束縛毋使驚
懼江浙逆犯已解到部俟其到齊一同對質

湖南巡撫臣王國棟謹

奏為奏明事竊查湖南辰州府鹽木二項落地稅銀
向係知府監收每年額徵銀二千四百餘兩經前
撫臣布蘭泰訪知所收加倍復據該府通判蔣燾
稟稱約有羨銀六千餘兩行據該府知府汪立名
詳稱止收過贏餘銀三千五百餘兩隨

題請暫委蔣燾監收後因蔣燾不將伊署府任內收
過贏餘銀一千二百兩據實報出復

題請改委陞任乾州同知王柔監收以定稅額臣查

辰州府徵收鹽木二稅向無部頒定則如鹽稅一項每包徵銀一釐六毫而木稅一項則計價輸納查汪立名詳稱伊任內悉照院司詳批定案如杉木圍圓六尺者作價銀四兩五錢每銀一兩收稅三分其松木槩不收稅而王柔當日

題請改委監收之後另定科則將杉木圍圓六尺者作價銀五十八兩每兩收稅三分松木又一例徵收據稱照現在採買解部木植定價徵收有減無

增而較之從前已多數倍又值雍正五年夏秋水
發木簾絡驛而下所以一年之內收過正額贏餘
共銀九千三百餘兩然王柔亦不敢即以此為定
額仍請再收一二年照河水大小以定該年稅銀
之多寡經臣

題明准有部覆在案惟是該府木稅祇因向無部頒
定則是以各任徵收例不畫一稅則懸殊難以遵
守前布政司朱綱任內曾經具詳前撫臣布蘭泰

咨請工部頒發則例續准部覆以辰州府鹽木稅銀作何徵收該撫從前並未報明本部其應照何例徵收之處無憑定議等因咨覆在案臣思同一六尺圍圓木植而汪立名照從前詳案作價銀四兩五錢每兩收稅三分王柔作價銀五十八兩亦每兩收稅三分未知各省木稅作何徵收自應酌定稅則頒發徵收庶商民不致偏累而可永遠遵循除現將汪立名王柔各任內徵收木稅款項造

冊咨部酌定則例頒發徵收外相應

奏明伏祈

皇上睿鑒謹

奏

據奏則汪立名之欺隱王柔之實心任事已歷歷可見矣今不待王柔徵收一二年後試準確數而遽請定則例該部自必仍以無憑定議為辭似此空文往來咨行朕實不解且若部中竟議定汝等必不能足之數頒行

到彼則又當作何徵收耶殊屬昏謬之至

湖南巡撫臣王國棟謹

奏為奏明事竊查茶陵州知州王克修年力強幹辦事有才因賦性褊急用刑過嚴地方甚有怨聲但伊自雍正四年十月任事能將接徵康熙五十九年起以及雍正元二三四等年積欠錢糧全數催完本任經徵雍正五六年錢糧亦俱通完無欠實有可取使能悛改性情即為循吏臣查岳州府

慈利縣知縣陳采先經臣

奏請調補城步縣要缺已蒙

俞允在案所遺員缺雖稍簡於城步亦屬苗疆例應揀
補且該縣尚有歷年積欠錢糧正須清理今王克
修催徵積欠已有成效請即以王克修調補慈利
以知州管知縣事仍照原銜陞轉臣嚴加教導使
之恪慎供職倘該員調任後仍前任性重刑一有
劣蹟臣即據實糾叅除會同督臣邁柱另疏具

題調補外合先

奏明伏乞

睿鑒謹

奏

王克修既如此催科有術因公任怨則嚴刑之論更當
詳察今若調任慈利經徵積欠又不容其嚴厲則是繫
其足而使之趨也如此刻待屬吏恐將來湖南無一實
心任事之員矣此人不可仍留汝屬下候朕調來另用

刑部左侍郎臣杭奕祿副都統臣海蘭湖南巡撫

臣王國棟謹

奏為請

旨事雍正六年十二月初八日臣等將會審逆賊曾靜
親筆供單及逆書稿本業經會摺進呈

御覽其逆賊張熙并供犯嚴賡臣車鼎豐等亦經飛咨
陝西江南浙江督臣分提去後雍正六年十二月
二十八日准陝西督臣岳鍾琪咨稱訊據張熙供

毛儀係寶雞縣貢生前曾路過他家也已故五六年了等語現在差查如毛儀果故即當移解張熙聽審合先咨覆等因本年正月初七日准浙江督臣李衛咨稱此案先奉

密旨隨將嚴賡臣沈在寬已故呂晚村之第九子呂毅中第四子呂黃中長孫呂懿歷密提到案嚴訊確供委官李國正等於十一月初六日管押起程解赴刑部投收訖其備忘錄呂子文集并別項書籍

俱經兩次固封具摺進

呈并將呂留良家現存書目抄冊同送在案相應粘
抄供單咨覆等因該_臣等查核單內嚴賡臣等各
供與前審曾靜口供相同其張熙赴陝上書之處
雖據曾靜堅稱嚴賡臣等並不知情但必得對質
嚴訊始可完結相應會摺

奏請伏乞

皇上敕部將嚴賡臣等押發來楚與曾靜張熙等三面

質明另容臣等按供律擬請

旨定奪至供犯車鼎豐等據差役回稱江南督臣范時

繹已經遣員解來於正月二十外可到合併奏

聞謹

奏

已有旨令汝等押帶各犯來京矣

湖廣總督臣邁柱湖南巡撫臣王國棟謹

奏為欽奉

上諭事竊臣等奉

上諭各省官員養廉著各省督撫悉心商酌司道等官既有養廉何得仍收屬員陋規令督撫一一嚴查據實陳奏等因欽此隨檄布按兩司移行道府州縣一體欽遵如有私收餽送規禮據實詳報尚有未分給養廉之員一并議詳去後茲據布按二司詳稱准驛糧衡永岳常辰沅各道回移并長靖等九府詳稱湖南司道府州縣各官自雍正元年將額徵

錢糧耗羨分給養廉之後一切陋規革除殆盡實
無餽送私收情弊今又蒙

皇上令將通省耗羨計算均分又將雜稅贏餘添入給
與敢不凜遵

功令益勵清操惟司道府首領及州縣佐雜等官尚
未給有養廉等情前來臣等又細加體訪邇來司
道府並不敢違例受賄而州縣亦不敢私行餽送
實無陽奉陰違之事倘有營私壞法不肖之員臣

等一經察實立即叅劾至湖南雜職各官向無養廉但此等微員專供差遣俸薪無幾實不敷用臣等推廣

皇仁行據布政司趙城將糧道楊秘報出每年充公鹽規銀八千兩除各府州縣教職并驛丞等官從無差遣自有額俸用度無庸酌給外其餘司道府之首領各官及州縣佐貳吏目典史巡檢等官似應按照品級酌給養廉今議得分給雜職各官共銀

四千九百兩尚餘銀三千一百兩查永保桑三司
改土為流現已詳請具

題設立州縣佐雜等官將來亦需養廉應預為酌派
今議得新設各員共分給銀三千五百八十兩不
敷銀四百八十兩應於另摺均派司道府州縣等
官養廉餘銀內動支湊給除飭布政司自本年為
始遵

旨一面辦理外相應會摺奏

聞伏乞

皇上睿鑒謹

奏

似此之奏朕不過一覽而已從不批諭是非當否也直
省皆然總在爾等督撫自為酌行

湖廣總督臣邁柱湖南巡撫臣王國棟謹

奏為欽奉

上諭事雍正六年十二月准戶部咨開

上諭又准兵部遞到和碩怡親王等字內開

上諭為湖廣官員養廉等因各到臣欽此臣隨即轉行

布政司欽遵並通飭查報曉諭去後該臣等查得

湖南各官養廉經前督臣楊宗仁將通省地丁錢

糧每兩收耗一錢內以三分解司公用七分給司

道府養廉在案但額徵多寡懸殊其中不無偏枯

茲荷

聖明洞鑒令將通省耗羨計算均勻分給又將各府雜

稅項下報出贏餘銀兩添入給與

聖恩優渥亘古未有今臣等查湖南通省額徵地丁錢糧加一耗羨共銀一十一萬七千九百五十二兩零內除三分公用銀三萬五千三百八十五兩仍應留貯司庫外實耗羨銀八萬二千五百六十六兩零又常辰二府報出帶徵商稅贏餘銀七千五百兩又常寧武岡等十一州縣徵收雜稅項下欽遵

諭旨報出贏餘并鹽規銀二千四十七兩零又巴陵等
五縣實徵蘆課耗羨銀一百五兩零以上通共耗
羨贏餘銀九萬二千二百二十三兩零應按照職
官大小事務繁簡均給養廉酌派布政司銀九千
兩按察司銀七千兩驛糧道銀四千兩衡永岳常
辰沅三道各銀一千七百兩長沙府銀二千五百
兩衡岳二府各銀一千九百兩永寶常辰四府各
銀一千七百兩郴靖二州各銀一千三百兩長沙

等八州縣事繁地衝各銀一千二百兩湘陰等十
州縣係屬次繁各銀一千兩醴陵等十五州縣係
少簡之缺各銀九百兩安化等二十九州縣係最
簡之缺各銀六百兩以上司道府州縣共分給養
廉銀九萬一千三百兩尚餘銀九百二十三兩零
查湖廣巡察往來湖北湖南地方遼濶費用繁多
除湖北另行議給養廉外茲湖南議給養廉銀四
百兩即從前項餘銀內動支尚餘銀五百二十三

兩零查永保桑三司業已改土為流現今議設府
縣雜職等官將來亦需養廉及司道府首領併州
縣佐雜等官一并酌派另摺奏

聞再湖南同知通判養廉

臣等先經

奏請在於鹽規銀內支給合併陳明伏乞

睿鑒謹

奏

朕意仍同前諭汝等料理此事不可言已奏過三字亦

不可言奉旨二字但令通省屬員心服首肯將來不令
接任者檢點則是矣若徒取快一時任意草率分派目
今聲名日後身家係焉公慎為之至於地方事務雖有
繁簡之分而薪水之資未必有多寡之異似此大相懸
殊或留為調繁調簡地步以便高下其手之意朕因未
悉地方情形不能無此一疑耳

湖南總督臣邁柱湖南巡撫臣王國棟謹

奏為奏明事據岳州營叅將稟稱華容縣地方於本

年三月十一日風雹驟至城內城外兵民草房吹
倒數百間並未傷損人口其祠宇衙署塘房亦被
刮損田園菜麥間有損壞大約橫計四五里直抵
湖北之石首縣交界五六十里等情又據華容縣
詳報前來臣等隨行布政司飛飭該地方官將田
園菜麥兵民草房以及祠宇等項傷損之處逐一
確勘明白仰體

皇仁酌動公項銀兩飭令分別賑恤修葺外理合據實

奏明謹

奏

觀汝等封疆大吏之伎倆再加以曾靜輩之百姓地方
上自應有此災異原不足為怪也



硃批諭旨卷六十中

欽定四庫全書

史部

硃批諭旨卷六十下

臣永瑢恭校

編修臣蔣驥謙覆勘

總校官中書臣朱鈐

校對官中書臣高中

謄錄監生臣王爾熙

欽定四庫全書

硃批諭旨卷六十下

硃批王國棟奏摺

湖南巡撫

臣

王國棟謹

奏為遵

旨丈勘復則田畝限內報竣仰祈

睿鑒事竊查湖南長沙衡州辰州各府屬之攸縣安仁
邵縣沅陵辰谿黔陽等六縣未經復則田畝經前

署撫_臣布蘭泰

題請荒熟併丈

_臣

於雍正五年八月內到任後接准

部咨奉

旨交

_臣

同布政使趙城悉心辦理揀選賢能諳練之員

將六縣荒熟田畝限二年內一併丈勘報竣仰見

皇上慎重田賦務期均平至意

_臣

隨行司遴委能員分

往各縣秉公實力詳細查丈去後旋據布政司趙

城詳據原任安鄉知縣趙琳原勘官署黔陽知縣

吳大煒前往沅陵辰谿黔陽三縣查勘隨據三縣
士庶俱踴躍急公情願復則查明復則田地共應
科徵銀五千九十九兩零請於雍正六年起徵造
具冊結詳報經臣核

題在案又據該司詳准原任衡永道徐聚倫咨稱帶
同委員原任安鄉知縣趙琳調任江華知縣鄭鼎
勲并署安仁知縣段一騷原任澧州知州黃炎并
鄧縣知縣劉朝佑分勘安仁鄧縣田畝隨據二縣

士民俱感悟自首安仁丈出復則田地應科徵銀
共四十六百五十八兩零應科徵米共二百六十
五石零鄆縣勘明全復原則應科徵銀共二千四
百四十五兩零又丈出溢額田地應科徵銀共一
百八十六兩零均請於雍正七年陞科造具冊結
詳報亦經臣核

題在案又據該司詳據衡州知府陳沅詳稱帶同委
員原任醴陵知縣袁振緒并現任攸縣知縣陳文

言查勘該縣田畝隨據里民歡呼踴躍情願陞科丈出復則田地應科徵銀共三千四十九兩零應科徵米共一千七百三十八石零請於雍正七年起徵造具冊結詳報臣現在核確具

題以上沅陵等六縣丈出復則田地通共應科徵銀一萬五千四百三十九兩零應科徵米二千四石零此皆仰賴

聖恩寬大准予自首免罪小民俱感悟踴躍樂於輸將

各委員亦能殫心清釐均於限內報竣理合具摺
奏

聞謹

奏

朕嘉悅覽焉似此實心任事之員當察列等差援旨題
請議叙以示鼓勵

湖南巡撫

臣

王國棟謹

奏為敬覆

諭旨事

臣謹跪讀

皇上硃批

臣

會奏酌派養廉摺內

諭旨仰見

聖訓至明至當勉

臣

辦理務要均平可使永遠遵守弗

致日後更張

臣

雖至愚敢不矢公矢慎查南省各

屬州縣向來所得耗羨多者或至一二千金少者

或止二三百金原屬偏枯不均前荷

聖明洞鑒今將通省耗羨計算均勻分給

臣

與督臣邁

柱布政使趙城公同分別衝僻酌量繁簡總期多者不致糜費少者不致掣肘凡係事繁賦重之地方州縣各官幕友家丁必須多人一切費用自倍於簡僻地方則養廉不得不量為加多然已減於從前所給之數其餘稍繁稍簡最簡地方在州縣各官調度既易費用亦省因之酌盈劑虛均勻派給今計最簡州縣所派養廉較諸最繁州縣其數誠如

聖諭大相懸殊若比諸向來所得二三百金已加至倍

實可撙節足用

臣

惟凜遵

聖訓殫心料理不敢稍有草率以負

皇上體恤臣工至意為此具摺

奏覆謹

奏

前諭甚明朕實不深悉外任情形總期汝等秉公合宜料理妥協務使永遠可遵可守還朕一是字而已

湖南巡撫

臣

王國棟謹

奏為苗疆務在得人懇留賢員以策後效事竊惟楚
南一省州縣半屬苗疆必須熟諳廉幹之員方可
遴選補授而現今准改為流之永順保靖桑植各
土司經督臣邁柱會同臣酌議分設四縣管轄料
理

題明在案此等地方乃係新附苗疆非曾經熟悉苗
情土俗潔已勤公之員斷難勝任今查得湖南衡

州府屬之臨武一邑地屬苗疆訪知原任知縣趙
侗數居官數載頗有聲名苗夷情形俱經諳曉實
係廉介勤慎之員茲因該員失察前任知縣卜瑗
冒銷老民老婦銀兩一案奉文革職又欽奉

恩旨著

臣

出具考語送部引

見_臣思地方緊要人材難得仰懇

聖恩俟該員赴部引

見後倘蒙

聖鑒以該員尚可錄用仍請發回楚省聽臣以新設之

縣酌量補授該員亦必感激思奮益圖報稱庶要
地收得人之效矣理合奏

聞伏乞

睿鑒批示遵行謹

奏

引見時候朕審觀其人而酌用之至於汝之鑒別殊難
聽信也

湖南巡撫

臣

王國棟謹

奏為奏

聞事竊

臣

接到怡親王及大學士等寄字有原任施州

衛千總王倬因改衛為縣裁缺另補今王倬並未

到部或仍留在楚亦未可定巡撫可即密行查訪

倘王倬尚在楚省即密行解送來京以與曾靜有

對質之事等語

臣

遵即差人確訪查拏一面密札

督臣在武昌省城密緝去後茲准督

臣

邁柱在武

昌城內拏獲該弁委員押解前來除經起具文批
差巡檢毛峻德將王倬一犯押解刑部查收外理
合具摺奏

聞謹

奏

此人緝獲可嘉曾靜所供一事辦理甚屬糊塗有旨交
怡親王大學士等轉發

湖南巡撫

臣

王國棟謹

奏為敬覆

硃批諭旨事竊

臣

家人恭捧

批回奏摺到長沙

臣

隨跪接開讀內奏

聞辰闕木稅一摺並調補王克修一摺俱奉有

皇上硃批

臣

遵查辰闕木稅原無定則自王柔監收以

來現在照買木價值定則徵收而商民狃於積習

不無物議王柔於正月上省時力言今歲不願接

管

臣

面諭方今

聖明在上但當竭力辦理如以人言為疑現今藩司商酌具詳請將前後收稅情形咨部王柔始言如果咨部永定章程則今歲情願接管是以臣據詳咨部併具摺

奏明茲蒙

訓旨至聖至明無微不照臣知識愚昧實切慚惶至王克修莅任二載有餘能將積欠清完實為能吏但士民有以故入人罪控者有以多收火耗控者臣

因其致怨有由又因其才有可用仰體

皇上愛惜人材至意委曲保全嗣因慈利縣係苗疆要缺且有積欠一時不得其人臣與布政使趙城共

商將該員

題請調補并將地方怨咨之情上達

天聽臣受

恩深重總期事無欺隱據實陳奏今蒙

天恩切加訓誨臣惟凜遵

聖諭刻骨銘心以免供職守而已為此繕摺

奏覆謹

奏

朕之神仙技術豈能探微索隱不過據汝等所奏衡情酌理而已諸凡如欲據實不欺即當盡情剖露一字不隱若不欲據實則仍循故套含糊支吾可也何乃半吞半吐令朕會意於章奏之外及至降旨嗔責始將所餘一半情由陳奏從而巧為支飾是則朕之過舉實係汝

等有以陷成之也據汝前奏王克修朕之批諭便與天下人公看公論朕實無過

湖南巡撫

臣

王國棟謹

奏為奏明事竊查原任辰沅靖道張楫前在長沙府及署岳州府任內分賠長沙等縣虧空並張聖弼等開欠各項共銀一萬三千二百餘兩穀二千石零先後准到部咨俱經飭行催追立限嚴比據張楫呈稱奉追銀穀自應遵限完補但楫先因分賠

茶陵善化等州縣虧空以及王之樞許大定等開
欠之項已將原籍產業盡行變賣完公業奉移咨
本籍搜查家產盡絕出結在案今各案分賠開欠
萬難補苴惟有從前各省官員借欠張楸銀兩及
楸賣出田房可以找價銀兩并審明

題定原任巡撫王之樞名下應追還抵項銀兩共計
銀一萬七千一百二十七兩俱有借約印契及書
札并審案可據並非假捏雖蒙分咨查追但隔省

延挨亟請

題追等情

臣

查張楸名下應完銀穀雖非本身虧空

然分賠等項均關

國帑當即照原呈所開分咨直隸河南江西廣東湖北等省查追隨批司確查茲據布政司趙城查覆張楸欠項已據各該省咨覆欠銀人員俱已自具認呈等因原任巡撫王之樞亦已自行招認其所開各項似非假捏但隔省咨查恐致遲誤

臣先據

實

奏明一面另行具

題請

敕各該員人等任所原籍查追完補庶

國帑不致久懸謹

奏

其秉公實力辦理若互相推卸延捱亦斷不能逃朕覺
察也

湖南巡撫

臣

王國棟謹

奏為奏

聞事

臣

因貴州現在勦撫生苗竊慮苗中暗通信息屢

經密札鎮道整飭兵馬嚴加防範續據鎮筵鎮

臣

周一德覆稱十二月十一日親歷各汛遊巡查所

屬三岔坪兇苗吳老賞同伊子吳普六等及崔兒

寨兇苗石老虎偷盜拏人黨串窩盜復因苗頭吳

老四欠伊銀兩擅將乾州左營兵丁齊國俊捉白

抵黑萬難寬縱現委該營守備陳友設法勦除等情又據鎮臣周一德札稱雍正七年正月十二日守備陳友同鳳凰營通判白豐押同百戶吳貴三苗目吳老四等帶領兵役前往協緝詎吳老賞等藏匿雀兒寨石老虎家膽敢操戈拒捕戮傷苗目吳老四右手吳貴三等當將吳老賞吳老元石老虎三兇殺死又生擒吳普六吳老滿二名各寨頑苗見渠魁不保首領共生畏懼等情并據通判白

豐稟同前由伏查兇苗拒捕誠為罪不可逭今見
首惡就戮咸知警畏臣又密札本管文武宣布
皇上德威相機撫戢固不可喜功生事亦不可釀惡長
姦務期剪惡安良以靖苗疆以宏

聖化除在事百戶苗目人等經鎮臣分賞牛酒花紅銀
牌外理合具摺奏

聞謹

奏

如欲清釐楚省此等事件非邁柱王國棟輩督撫之所
能諸凡當量已之才力而為之不可因見有猷有為之
人整理得法遂爾起心欣羨勉強效顰也

湖南巡撫

臣

王國棟謹

奏為奏明事竊查辰沅靖道王柔盤獲江西流民許
英賢等經臣具摺奏

聞並將湖南查無朱文先等藏匿南岳及王柔續獲許
世基等各情由奏陳

天聽茲准署江西撫

臣

張坦麟密咨內稱行據廣信府

貴溪縣前往上清宮公同署真人張慶麟逐戶挨
查並無張易珍其人止有遠族張翼軫生平訓蒙
餬口不與外人往來訊據鄰佑僉供並無為匪情
弊又據南康府行據建昌縣確查江自得劉惟和
劉冠祿並無其人江東榮江東號原往雲南行醫
已於丙午年身故許世基許世朝俱往湖廣行醫
其許世堂許世胄許世龍盧士奇出外未回止拘

獲生員李次文許英賢之父許有儀許世基之父
許冠瑞代許世基帶回銀信之許英資代許世朝
帶銀之許冠祿及收世朝寄銀之許世治又據南
昌府奉新縣拘獲張子明并稱所開何黃道住三
溪橋係建昌縣所轄今查亦無其人又據九江府
行據德化縣遍查並無朱文先名目經該撫臣張
坦麟及司道公同嚴訊張翼軫李次文張子明許
有儀等口供取具署真人張慶麟及各府縣送到

印甘各結前來

臣

查閱江西撫臣來咨各供與許

英賢在

臣

案下所供相符似非捏飾查許英賢假

天師捨藥名色騙人財物自非善良但既已查明並無謀為不軌情事似可無庸具

題俟雲南督

臣

鄂爾泰查覆江自得虛實覆到之日

臣

即將現獲各犯咨解江西撫臣衙門飭發各原

籍地方安插收管其為首哄騙之許英賢仍聽撫

臣

張坦麟酌擬發落完結所有准據江西撫臣查

覆緣由合先具摺奏

聞謹

奏

此一件小事何必如此屢屢煩瀆總之根本立心處祇為已私起見所以枝葉發出一言一事非過則不及也

湖南巡撫

臣

王國棟謹

奏為奏

聞事竊查湖南各府州自春至夏雨俱霑足惟常德一

府及岳州西屬雨尚未足後於五月初旬各處俱
大霈甘霖插蒔之後禾苗暢茂五月內暨六月初
旬雨澤均沾將來再沛甘霖則中晚二稻可望秋
收今早稻秀實收成頗好俟各屬報齊分數再行
奏

聞又辰州協副將李國采稟報永順王村地方於五月
二十五日未時有風雹一陣揭損民間草房臣現
在行令地方官確查輕重應賑恤者即動公項賑

恤理合一併附

奏伏乞

睿鑒謹

奏

覽

俟秋收後方可言必也惟當加勉誠敬以待之

湖南巡撫

臣

王國棟謹

奏為欽奉

諭旨事本年五月二十日湖南觀風整俗使臣李徽至

長沙口宣

皇上諭旨王國棟前任浙江觀風整俗使爾到湖南可

諸事問伊即云是朕如此傳諭又爾與王國棟兩人
辦理地方事務當一心一意如同一人等因欽此臣

跪聆之下感激無地臣前奉

命赴浙荷蒙

皇上諄切指示俾臣得有所遵循又與督臣李衛共事

同心協力罔敢隕越今臣謬膺封疆屢叨

聖慈詳加訓誨奈因南省民風習成刁悍臣實才識短

淺亦嘗加意曉諭而勸化未徧亦嘗竭力稽查而

耳目未周仰賴

聖明特簡李徽畀以觀風整俗重任並

諭臣等一心辦理臣隨將浙江觀風任內所有臣自行

辦理并與督臣公共辦理各事務及湖南地方情

形與臣現在料理之處備細告知從此恪遵

聖諭協力同心整齊化導務期人心和厚姦慝潛消以

仰副

聖天子化民成俗之至意為此繕摺謹

奏

朕用李徽取伊具有一片良心至於其才其能不必問者甚與此任相宜彼此互相協助為之

湖南巡撫

臣

王國棟謹

奏為敬覆

硃批諭旨事竊

臣家人恭捧

奏摺到長沙

臣跪迎開讀內敬覆

諭旨一摺并奏明許英賢一摺俱奉有

硃批伏念

臣愚無知識荷蒙

聖恩深厚委任封疆夙夜兢兢時憂舛誤王克修一事

臣前摺所

奏原未詳悉許英賢一事本屬小事訛傳

臣又將江

西撫

臣張坦麟咨覆緣由復行陳

奏此皆

臣

智識短淺辦理實未妥協茲蒙

皇上高厚之恩詳加訓飭

臣

跪捧

硃批反覆尋繹無地自容悚惶既深感激尤切惟有小

心惕厲殫慮竭誠以求無負

聖訓而已

臣

無任戰慄惶恐之至謹

奏

但務本莫逐末如田文鏡等皆因根源清潔所以枝流
邊無往而非是遂有得心應手之效若捨本求末譬如

入海算沙何有窮盡耶

湖南巡撫

臣

王國棟謹

奏為奏

聞事雍正七年六月初十日准兵部火票遞到和碩怡親王等寄字內開據逆賊曾靜供稱記出有兩箇偶爾傳言的人一是安仁縣生員姓何名忠立曾說他聽聞有箇茶陵州人姓陳字帝錫傳說朝中有人上議

皇上多條又永興縣十八都有箇醫生姓陳字象侯也
說他在一處人家行醫聽得人說茶陵州有箇堪
輿姓陳字帝錫口傳有箇本章諫議

皇上那上本的臣子姓岳名鍾琪等語巡撫可密將安
仁縣生員何忠立永興縣醫生陳象侯茶陵州堪
輿陳帝錫行提到省細訊何忠立陳象侯伊等向
曾靜如何說并問陳帝錫所傳之語本於何處伊
等若承認直供則將伊供出之人一面奏

聞一面提問如伊等不肯承認巡撫可委曲開導伊等
猶不實供則用刑訊刑訊若仍不得實著將何忠
立等解京與曾靜對質又曾靜供所傳收密親王
妃嬪等語是雍正五年五六月內往來路上人傳
說衡州路上押解一箇犯官過如此說等語巡撫
可密行查訪五年五六月間何犯過衡查明一併
具奏且將五六月間過衡人犯姓名密行知會廣
西巡撫等因到臣隨分差標員密檄各州縣逐一

查提先據永興縣獲解醫生陳象侯到

臣

取有該

犯親供並供出武生何獻圖

臣

即密行拘提去後

又據安仁縣獲解生員何立忠即忠立并獲解供

出之何獻圖茶陵州獲解堪輿陳帝西即陳帝錫

各到

臣

亦俱取有該犯等親供又據陳帝西供出

何獻圖妹夫張繼堯據供若提到張繼堯情願與

他對夾等語

臣

查逆賊曾靜在京所供陳象侯何

立忠傳聞之言均出堪輿陳帝西之口及訊現犯

何立忠及供出之何獻圖亦俱稱陳帝西告知是

陳帝西實係傳言要犯經

臣

反覆開導詰其傳自

何處得自何人據供實係張繼堯傳說

臣

恐狡飾

仇誣當經刑訊該犯堅供必俟張繼堯到案對質
著落除現在密提張繼堯并追取抄錄孔明碑文
到日質審明確再行具

奏外所有訊取現犯供單先呈

御覽至奉查雍正五年五六月內經過衡州官犯

臣即

密查是年五月二十二日兵部遞過人犯一名達

色六月初四日兵部遞過人犯一名蔡登科

臣

又

細查是年四月初七日兵部遞過人犯一名馮守

柱七月初十日兵部遞過人犯二名耿桑格六格

太監一名吳守義七月二十四日兵部遞過太監

一名霍成俱係發往廣西之犯

臣

當經密行知會

廣西撫

臣

金鉅在案理合一併奏

聞伏乞

金史卷之六
皇上睿鑒謹

奏

爾地方上頑民有此等惡習漫無覺察致令他處發覺
特命部臣前來究審又不能將一類姦匪查出巡撫封
疆之謂何從京指名數犯交爾審究蓋恐姦徒聞風遠
颺故令爾就近設法鞠訊以得其實情今閱所奏但將
已經問出之供任其彼此推卸延捱時日究未知出自
誰口亦可謂才德兼全忠誠任事之巡撫矣此一千人

犯自然須解京審問如再究出他犯亦自然在爾地方
上但必將有名人犯一一交出方可

湖南巡撫

臣

王國棟謹

奏為欽奉

訓旨事雍正七年六月十七日准兵部火牌遞到內閣
大學士等寄字一封內開雍正七年五月二十日
皇上發下

硃批湖廣巡察御史王瓚奏摺二件奉

旨爾等可將王瓚奏摺及朕所批諭旨抄錄寄與王國棟看王瓚所奏皆湖廣地方之事朕以其不能體諒督撫之苦衷已嚴切申飭但思督撫等如果實心辦理事事妥協亦不至被人指摘條奏可寄信與王國棟有則改之無則加勉欽此遵

旨謹將

硃批奏摺抄錄寄來等因到

臣

跪讀之下仰荷

聖慈體諒復蒙

聖訓誠勉

臣

雖至愚亦有天良嗣後惟有殫心竭力更

期詳審以無負

皇上有則改之無則加勉諄切期望之至意為此繕摺

謹

奏

仍同前諭改勉與否則在汝自為之也

湖南巡撫

臣

王國棟觀風整俗使

臣

李徽謹

奏為奏

聞事竊

臣

李徽在衡州地方據衡協副將崔起潛密稟

據把總王言稟稱梅田塘兵盤得浙江紹興府諸

暨縣民周楠言涉曾靜逆案隨經

臣

李徽密傳親

訊據供曾靜黨羽為首有信通知曾靜實係在省

袁熾又稱門簿及往來書札可查等語

臣

李徽隨

差員飛至長沙知會

臣

王國棟經

臣

王國棟查明

袁熾係督催通省部務之人當即密檄長沙府拏

獲收禁搜查該犯書籍字札封固貯庫

臣

李徽自

衡回省即會同

臣

王國棟面委在城司道等取供

去後今據會訊周楠供稱小的因往洪江生理遇
見曾靜地方上共有八九箇人內有一箇叫楊天
佩一個叫朱士元一個叫王友生其餘不知名姓
據他們說袁熾與曾靜有書信往來都是他起頭
的我們為這箇奴才往雲南去避避再小的於閏
七月初三日從洪江來同一箇在綏寧縣作長隨
姓張的一船往長沙他說曾靜可比方孝孺又說

這箇事袁提塘膽大了些再雍正元年二月小的
在家聽得杜海在孟伯籲藥店裏毀謗

皇上有陳學松徐萬成周孟文連小的四個人聽得的
那杜海是袁州衛守備袁信的家僕都是諸暨人
等語訊據袁熾供稱並不認得曾靜若說傳遞音
信是何音信在何處與他的若有往來的字跡經
過多少大人審過其書籍現在貯庫豈有不查出
的理若與袁熾往來不軌曾靜還有不說的麼今

周楠說聽見人說的又供說的人往雲南去了這
明是虛話毫無憑據等語隨經密提周楠供出之
綏寧縣長隨張姓據伊妻何氏到案供稱伊夫張
鳳本年三月往綏寧當長隨閏七月初回家住不
幾天往廣東去了等語錄供詳解前來復經臣等
公同會鞠供情無異隨將搜查袁熾家中現在札
簿書籍當堂細檢並無與曾靜往來確實字跡除
現在據供檄行永興縣確查該縣有無楊天佩朱

士元王友生等曾否避往雲南并密行綏寧縣確
查張鳳現在該縣充當長隨與否如已往廣東應
再移咨查拘確訊外臣等備查周楠指首袁熾與
逆賊往來雖係得之途人之口然事關重大未便
以曾靜從前未經供及現在未有確據致有縱漏

相應據情會奏仰祈

詔訊

曾靜並不識袁熾其陳學松等姓名亦皆一人不

識明

係誣捏可將周楠臨何假捏情節究審明白袁熾

為不軌情事知會等以便遵行其周楠所供本

既係無辜籍杜海卿子毀謗情散由應否

敕下浙江督臣查拏確究合併附奏統候

審裁謹

奏

此所奏是地方上凡如此等事皆當留心察究不可臆斷其無而或致疎忽縱漏也

湖南巡撫臣王國棟謹

奏為奏

聞土苗聚衆撫諭解散地方寧謐事竊查湖南辰州府屬新設改流之永順地方原設同知一員專司撫綏彈壓前任郴州宜章縣知縣潘果係屬苗疆州縣在宜邑任事二載地方安靜臣隨

題請補授永順同知該同知赴任時

臣

復再三訓飭

永順土司初經向化地方事宜逐漸整理方不驚擾隨據該同知稟稱土司舊用舍把頭目不卞百數此輩向預民事凌制小民卑職始至大張條約

禁革不許私擅行事務絕假借之端以免欺陵之累等情前來臣又當即批飭漸次料理毋得驟事更張去後詎兩月以來聞得永順土民於本年四月十六日擁衆百餘及田王二崗亦聚集多苗在永順南門城外聚衆噪嚷四路守寨聲言潘同知酷刑重耗差役下鄉苛索滋擾并捉拏衙役等情臣思新附苗疆非內地可比雖所稱劣蹟虛實未定而撫綏不善即難辭責似此不職廳員斷難姑

容_臣一面將該同知會疏

題叅一面飛檄辰沅靖道王柔辰州府知府袁承寵
持_臣告示前往曉諭解散土衆委常德府通判劉
法祖署理同知事務又檄行布按二司將該同知
摘取印信押回內地確查劣蹟實情嚴拏擾民蠹
役及究處倡首土民確審定擬在案嗣據該道府
稟稱田王二崗土衆已遵奉約束漸次散去永順
舍把土民亦遵奉曉諭俱已解散具呈懇請銷案

等情到臣復飭行該道府悉心安輯再加曉諭毋
仍蹈前轍務期永遠寧謐至該同知所有劣蹟虛
實并土民聚衆起釁情由已檄行司道府詳加確
查統候奉

旨飭審一併定擬另行

題報臣謹將現在永順土民聚衆已經解散情形具
摺奉

聞又臣揀選未當惶懼實深業於疏內檢舉聽候部議

合併

奏明謹

奏

汝猶醜顏陳奏可謂無恥之極矣似此新聞苗疆要任所保題者乃潘果之流其他尋常之缺尚可問乎以汝此等督撫而令朕假以舉劾之責何從信任然亦無怪乎汝等朕簡用之督撫皆如王國棟等輩則督撫保題之員應皆如潘果等流也奈何奈何此皆朕乏識人之

明源不清而望流之潔庸可得乎朕亦無顏降旨責汝
矣惟自愧而已夫復何論

湖南巡撫

臣

王國棟謹

奏為永順地方遼濶委員分駐以資彈壓事竊查湖
南新改流土司地方惟永順一隅最為寬廣又田
王二崗各苗更為頑梗現在駐永止有同知一員
管轄實屬鞭長莫及臣向於江西寨相近永順地
方委乾州同知沈元曾分駐管理今沈元曾奉差

往京查有原任醴陵縣知縣袁振緒諳練苗情因
攸縣大量事竣回省臣即檄委協理辰州同知駐
劄江西寨同永順同知分管在案但查該員原係
減則案內解任之員經臣查係無干

題請開復併請留楚補用部議准其開復應否留楚
之處俟引

見時

欽定今因該員委勘攸縣田畝尚未給咨引

見惟是永順地方係新聞苗疆非才裕守廉熟諳風土之員不能勝任查袁振緒實屬廉幹之員可於苗疆緊要缺內補用仰懇

聖恩准其留楚彈壓地方併請於永順等處新設四縣內酌量將該員

題補一缺俟料理地方諸務就緒後再行給咨引

見庶要地得人而臣亦得收臂指之效矣為此具摺奏聞伏乞

皇上海鑒批示遵行謹

奏

或又如潘果之流亦未可定既據奏稱為地方人材起見姑照所請委曲懷疑而試用之已有旨諭部矣

湖南巡撫

臣

王國棟謹

奏為奏

聞事竊查湖南地方早稻收成分數據各屬具報通計七八分不等長衡永寶辰郴靖各府均稱雨水調

似此不從吏治民情根究本源徒率司道齋戒祈求恐
未必有感應也

臣現在齋戒率同司道等官在

龍神廟祈求并檄行該府縣虔禱冀沛甘霖目下米
價上米每石九錢七八分至一兩不等中米八錢
七八分至九錢不等理合一併奏

聞謹

奏

該省遇汝等一類督撫朕實不敢望雨暘時若也何則

不能移易吏治民風惟憑一已榮辱之私腸而欲上格天心斷無是理幸獲收成一兩年亦屬

上蒼赦過之仁耳且楚地為向來豐稔之省今直省連歲俱獲成熟惟湖南非旱即水如布蘭泰之巡撫在上曾靜之小民在下則頻年大水之應何莫非

上蒼從輕降罰耶布蘭泰在湖南則被水患調江西則致旱災汝等督撫之上干咎徵如此至明且速而猶不知信懼亦可謂冥頑無識者矣然朕亦豈能辭其責但若

以雲貴河東浙江陝西等省而論則又不可概言過在朕躬也亟當思維根本之治誠求

上天垂佑之道庶幾和氣下應地方獲福無窮矣再者聞按察使郭朝祚一味柔善因循沽買名譽朕許兩司俱得摺奏從未見伊將所聞所見據實上陳以盡臣子之心惟以苟且塞責迎奉上司為得計觀伊志趣似欲仍學伊父當日積年老練巧詐鑽營以為一生安享子孫受用光景殊不知大謬矣其命伊學趙弘恩作為若不

肯悔改如醉醒夢覺洗滌肺腸恐一旦禍及身家將伊父從前欺詐負國婪贓不法處逐一發擿時莫謂朕不教而加之處分也諭伊深思朕拔擢之恩為伊父幹蠱之道今此訓諭之旨並伊自身所立之志反覆揣量是非利害輕重大小而為之可也明白向伊傳旨令其差人來京到大學士張廷玉處轉奏

湖南巡撫

臣

王國棟謹

奏為

聖恩高厚臣罪難辭仰懇

陛見面聆

聖訓事竊臣奏永順土衆解散一摺蒙

皇上硃批嚴飭切責臣跪讀之下恐懼戰慄無地自容

身任封疆似此緊要地方誤薦潘果撫綏不善潘

果有難辭之責即臣有莫追之罪伏念臣愚無知

識屢荷

此等差使稍知公廉自愛者皆能勝任今將巡撫專閫
皇上特達之知一差陝西典試一差廣東典試一差河

重任

南督學一差

浙江觀風整俗使

陸辭之日俱蒙

皇上諄切訓誨開導指示

臣俱敬謹鏤心不敢稍怠得

得免

免隕越今自浙莅楚將及二年辦理地方事務夙

夜祇懼如對

君親

奈才識淺薄責任重大而楚風刁悍逼近苗徭

臣

有忝職守以致上煩

聖慮

臣寢食居處刻不自安緣

臣在外日久弗獲親聆

皇上提撕警覺此此語更屬可笑心茅塞自難免於錯誤仰懇

聖慈准

賜陞見臣將楚南一切緊要案件次第趕辦於十月武
聞竣事之後暫以印務交布政使趙城護理臣兼

程入都瞻仰

聖顏將湖南吏治民風及各屬苗疆事理凡摺奏所不
能盡悉之情形得一一面陳

君父之前跪懇

皇上詳明誨導庶_臣知所遵循勉盡厥職得以稍報殊恩皆

皇上造就裁成之德也_臣不勝戰慄惶恐之至謹

奏

所當訓諭者從未聞朕訓諭之人不知朕意所向之人及全未經歷學習之人汝於未任觀風整俗使以前受朕面訓何啻至再至三如鄂爾泰以江蘇布政使擢授總督來京陛見如此重任亦不過留京四五日面見數

次田文鏡從祭嶽回京即命往山西察賑此後諸任再
未面領朕訓李衛自雲南來時止留京三日此三人並
非多聽朕諭深知朕之意向而能迎合之也豈有聞教
而不能受受教而不能遵遵教而不能行之人令其曠
官離職往返道途諄諄頻加訓諭之理此奏更屬可笑
爾切勿存凡事見面一言即了之念若然則廷臣無一
獲罪者矣何愚闇至於此極况朕已事事不辭千萬言
批諭總不能領會不能奉行不能振作鼓舞不能察吏

化民而忽思及陛見面請訓諭實不解汝具何肺腑朕意與其令汝前來受朕誨導反不如將汝隸於田文鏡李衛之屬下隨二人學習數年或可助汝心力之不及也

湖南巡撫臣王國棟謹

奏為奏明事竊查湖南地方長衡永寶辰郴靖七府州今歲雨水俱不久缺秋成有望惟長沙府屬湘陰一縣北鄉地近岳州六月中旬後雨水稍缺岳

州府屬之巴陵臨湘華容澧州石門安鄉岳州衛
九谿衛永定衛常德府屬之武陵桃源龍陽共十
二州縣衛自六月初旬至七月中旬雨澤愆期禾
多枯槁紛紛詳報臣現委員分往確勘除不成災
州縣衛外果有實在成災者當先將被旱情形具
題一面催造分數冊結另報但恐今冬明春一時米

價騰貴小民即至艱食

臣仰體

任用
皇上

懷保汝輩無能督撫朕亦難言懷保黎之至意酌動常平倉穀及鹽商捐銀所

買穀石分別輕重賑恤平糶動用之後即委員赴
長衡所屬有收州縣採買穀石運至本處其散賑
處所即以司庫三分耗銀照數買補其平糶處所
即以平糶價銀照數買補一轉移間而於地方民
生實有裨益再查現今十三州縣衛雖經報旱但
岳常二府今春二麥大熟目下米價未長臣為將
來民食起見預為籌畫謹具摺

奏明以便臨期料理伏祈

皇上睿鑒謹

奏

直省督撫中惟汝湖廣為次故今歲天下豐收亦惟汝
湖廣被旱

天道之感應可見分毫不爽休咎之徵如此捷若影響而
猶漠然不以為意朕實不解朕命田文鏡兼督山東則
今歲東省收成人言自四十一年來為第一歲此豈可
以虛詞捏造者乎況東省從來難遇豐收湖廣向來頻

逢大有設若命汝巡撫山東則朕至於不敢言矣覽所奏有何可諭惟深嘉汝一轉移間之一句耳似汝移粟平糶等舉不過剜肉醫瘡即幸獲平復焦頭爛額之功亦何足取耶總不知務本於一切事率皆先失機宜復從而追維補救濟否尚在未悉又居然自以為得此等襟懷伎倆朕亦無如汝何矣

刑部侍郎

臣

王國棟謹

奏為奏

聞事竊照東省賑濟一案臣於出京時跪請

聖訓蒙

皇上念切民瘼

特命臣會同查賑大臣加意辦理務令災民均沾實惠
并查實奏

聞臣到濟南之日查賑侍郎臣劉於義牧可登已經回
省隨細加面詢據稱所賑之處俱係實在被災地
方貧民悉沾實惠確訪輿論亦俱符合現據各屬

報到賑銀州縣衛所共七十六處計銀六萬九千七百餘兩賑穀州縣衛所共八十四處計穀一百二十餘萬石雖賑銀之數無多而散穀已經普遍是以領賑貧民此時俱各相安但尚有出外聞賑而歸並無藉刁猾之輩以及高阜居民見人領銀領穀因生覬覦紛紛向委員或地方官衙門求賑臣偶因公事出署亦有具呈求賑者臣已嚴飭各屬如確係被水災民間賑而歸者查實酌量補給

以廣

皇仁其有本未被水挾官求賑之地方姦徒現在嚴拏
究治禁遏刁風惟是被災州縣地方遼濶散賑各
官率多試用之員未諳賑務其中胥役鄉保串通
生監舞弊重複冒領之處恐未全除有現經委員
確查旋即刪減者臣復嚴飭布按兩司并五路監
賑大員確實清釐仍一面密訪重懲如有玩視賑
務之州縣立即指叅不敢姑容現在各州縣地方

安堵並無哀號賣鬻情形此皆我

皇上蠲賑並施浩蕩

天恩之所及也所有東省賑恤緣由理合繕摺奏

聞謹

奏

盡心撫恤窮黎實力清釐諸弊

刑部侍郎

臣

王國棟吏部侍郎

臣

劉於義謹

奏為奏明事竊照直省地方凡遇有災傷必須先報

情形後再勘實分數造冊

題報此定例也今東省因撫

臣岳濬

奏明俟查賑後一并核報在案

臣

等到任後即檢查

卷案傳詢布政使孫國璽據稱十月間曾詳報成

災歷城等州縣衛所共八十七處經撫

臣

岳濬簽

駁歷城等六十九處應准成災其淄川等十八處

應分別被水輕重另行核報等因現轉行確查未

經詳覆

臣

等日事嚴催於十一月二十四日據布

政使詳稱淄川縣等十八處移行道府確查僉稱
實係成災已經一體賑恤並無混冒取具切實印
結應請一并入冊等情前來臣等初莅東省未能
深悉從前被水情形既據司道府州等取具印結
詳送隨會商督臣田文鏡今督臣以先據司詳業
查內有齊河諸城二縣應另行確查批司駁飭在
案未便畫題并據布政使孫國璽申報督臣批駁
情由前來伏思今督臣批飭與前撫臣簽駁皆以

慎重災傷不憚詳審臣等何敢稍有草率除現飭
布政司再加確勘另詳俟到日會商督臣核明定
議

題報外惟是報災定例甚嚴處分最重今公文往返
需時歲內未能

題達事關重大現在另疏

題明合再將情由據實奏

聞謹

奏

所奏是理應查核確實詳慎為之者

刑部侍郎

臣

王國棟吏部侍郎

臣

劉於義謹

奏為奏明事竊照東省今歲漕糧蒙

皇上浩蕩洪恩

特頒諭旨山東被水稍重著將被水州縣之漕糧全行

蠲免業經撫

臣

岳濬欽遵出示曉諭通行在案但

臣

等伏查東省被水之初申報災傷處所頗多歷經

撫臣岳濬飭查今督臣田文鏡現在批駁尚未覆

查確實其實在成災之州縣除地丁應准蠲免外
漕糧亦應全蠲若僅止被水猶未成災之州縣則
地丁不在應蠲之列似漕糧未宜獨邀蠲免今臣
等細加訪察秋間被水之時雖災傷勘有輕重而
所被水患皆同幸賴

皇上恩膏疊沛賑恤宏施斯民得以安堵現在時值寒
冬若於目下催徵漕糧則小民困苦之餘亦覺輸

納維艱茲當辦漕之際州縣紛紛具詳請示除一面仰體

皇仁已面諭司道暫緩催徵外伏查被災分數現在飭司查實另詳歲內未能核定若俟

題報之時再行附請尚需時日理合具摺

奏明可否將被水未成災之州縣漕糧一體蠲免抑或緩至次年麥熟之後折色徵收皆係

皇上格外鴻慈出自

聖恩_臣等未敢擅便伏祈

皇上睿鑒批示遵行謹

奏

覽奏已悉候另有諭旨

署理蘇州巡撫印務_臣王國棟謹

奏為恭報秋成分數事竊查今歲江蘇等府屬地方
夏月雨水調勻入秋以來天氣晴明目下早禾已
節次登場晚稻亦漸及刈穫皆稱豐稔茲據蘇州

布政使白鍾山冊報蘇州松江鎮江江寧四府屬
收成俱有九分常州揚州二府屬八分淮安府屬
七分太倉州屬七分通州屬八分等因前來臣覆
核無異惟徐州及所屬四縣并徐州衛因七月間
被水低窪田地蕎麥晚豆有傷其高阜仍屬有秋
現在委員勘查先據稟詳已將情形照例會同署
督臣尹繼善具疏
題報是否成災再行具

題其海邵二州距蘇稍遠尚未據報到收成分數合
并陳明至各屬米麥等價現在俱平即徐州地方
據知州白潔稟稱雖低窪之地被水目今米價照
常亦無昂貴理合恭摺

奏報并另繕分數清冊敬呈

御覽謹

奏

似汝巧詐不實之奏朕殊不敢信以為然

署理蘇州巡撫印務臣王國棟謹

奏為恭謝

天恩事竊臣於本年十月初八日接准部咨奉

上諭嚴切教訓仍令臣往浙江暫署巡撫印務等因欽

此臣跪讀之下惶悚無地除另具疏

奏謝外伏念臣一介庸愚毫無知識屢受員

聖恩至優至渥盛極本年七月間復奉

命署理蘇州巡撫印務臣跪聆

聖訓感激之誠鑄心鏤骨惟刻刻以整飭吏治仰圖報
效為念是以甫入江南境內隨留心訪問各官賢
否即行奏

聞乃不細加詳慎於叙列現任各官優劣內并將舊員
入

奏此實

臣

智識短淺

非愚昧也

愚昧

正所謂孽障深重耳

無知所致

今蒙

諭旨切責教訓愧悔莫追

臣累及身家生命自有日也

之罪戾實無可追復蒙

皇上格外洪恩仍令

臣

往浙等侯俟督

臣

李衛起身之

後暫署浙江巡撫印務

聖恩高厚

臣

雖捐糜頂踵未足報稱惟有實力改悔恪

可笑

遵

聖諭

此等語不啻奏過百遍

務竭犬馬之誠以庶幾仰答

朕實觀之厥矣

洪慈於萬一所有微臣感激

天恩理合恭摺奏

謝伏祈

睿鑒謹

奏

覽

署理浙江巡撫印務臣王國棟謹

奏為恭請

聖訓事竊臣荷蒙

洪恩暫署浙江巡撫印務視事半月以來於從前辦妥
事務不敢自逞臆見再有紛更其現在應行事宜
亦不敢稍有觀望因循推諉致有貽誤但兩浙地

方遼濶海疆重大遠處未能周知未便冒昧妄

奏且

臣

智識短淺辦事無能屢蒙

聖慈格外寬宥復奉

諭旨批飭教導敢不痛自刻責加意奮勉伏懇

皇上天恩訓誨指示

臣

得欽奉遵循庶於地方事務不

致舛錯感戴

隆恩無既矣

臣

謹具摺恭

奏伏祈

皇上聖鑒訓示施行謹

奏

肯依李衛勸勉之言力行與否在汝自問耳朕有何可訓誨處

署理浙江巡撫印務

臣

王國棟謹

奏為彙報雨雪米穀情形事竊照浙省上年冬初雨水稍多後漸晴霽晚禾皆得刈獲十二月初九日降有瑞雪經

臣

等會同具摺

奏報又於十二月十五十七暨本年正月初二初三
初八等日俱得大雪據杭嘉等十一府屬各申報
積地約有尺餘至八九寸不等立春之後旋即晴
和日內又有小雨潤澤豆麥春花俱藉發生惟因
上年交冬陰雨米穀價值有不甚平減之處將來
或恐稍昂臣現會同署督臣李燦飭行布政司查
明酌議量將倉穀平糶以廣民食至嘉興府屬七
縣及杭屬之海寧一縣間被蟲傷蒙我

皇上天恩將應完漕米減價折收民人踴躍歡呼且因折漕米穀留存民間更得流通接濟是以八邑米價現今亦無加增為此具摺奏

聞伏乞

聖鑒謹

奏

王國棟之奏何足為憑不過聊一過目耳

署理浙江巡撫印務臣王國棟謹

奏為恭報微臣勘過海塘情形仰祈

睿鑒事竊照浙省海塘關係地方民生緊要時厯

宸衷今臣於本年正月十六日乘未開印之前親往海

寧及海鹽平湖等縣各海塘地方逐一親勘查自

老鹽倉大石塘起至海寧縣城南門一帶從前係

椿板塊石塘自雍正六七年至今間段改修大小

條石塘又自城南起至念里亭一帶從前係舊塊

石塘今連年改修大條石塘俱保固無虞其自念

里亭至尖山等處舊塊石塘歷有年所者均隨時
搶修完固至海鹽三澗塞塘工最為險要經督臣
李衛

題修舊塘八十丈新塘四十丈又矮石塘一百丈現
在各委員開工修築又鹽邑朱公亭寨等處附土
石塘一十三百餘丈現照原題酌量頂次衝險加
築石工平湖縣乍浦至獨山東舊石塘有數百丈
亦節次拆修惟因辦石頗艱先經委員在於湖屬

武康等處採石不敷今又飭於紹興府屬開採石
宕隨得隨運以副緊急除分令工員趁此春和潮
小趲修堅固并草土各塘草盤頭等工如有應修
整者俱於歲修案內隨時確核整理以資防禦外
合將微臣勘過海塘情形具摺奏

聞伏乞

皇上聖鑒謹

奏

海塘一應工務稍若懈怠遲悞及或妄立主見不循李
衛章程辦理致有疎虞必將汝正法示衆斷不姑貸然
海潮情形遷變不常權宜措置尤不可緩遇有應改移
處當星速咨詢李衛而行毋得任意更張

署理浙江總督

臣

李燦署理浙江巡撫

臣

王國棟

謹

奏為請留賢員以裨地方事竊查紹興府知府顧濟
美於本年正月十九日在任報丁母憂業經照例

具

題并委紹興府同知潘銓署理在案今據署布政使
張元懷按察使劉章糧儲道朱倫瀚寧紹道孫詔
等會詳稱該府顧濟美年力富强辦事明敏自到
任至今料理事件從無舛誤實係賢員請留在任
守制等情前來臣等伏查紹興一府濱連山海為
浙省繁劇之郡知府顧濟美勤慎練達民情相安
上年臣等奉

命赴浙於未經受事之前將應行事宜以及各屬賢否
備詢督臣李衛曾經李衛言顧濟美居官勤慎於
紹郡相宜今據司道等會詳請留在任守制緣臣
等均係暫署印務未敢冒昧具

題又不敢壅於上

聞可否將顧濟美給假兩月令其回籍料理仍赴浙省
准留在任守制則駕輕就熟於地方實有裨益矣
謹繕摺具

奏伏乞

皇上睿鑒

奏

照該署督撫所請行

署理浙江總督

臣

李燦署理浙江巡撫

臣

王國棟

謹

奏為奏明事竊照浙省因上年冬初雨水稍多晚禾
收穫之後米穀價值不能甚賤幸屢得瑞雪春花

漸見茂盛二月中連雨經旬不止直至二十五日

始晴

臣

等委員分往四鄉查看并據各屬稟報僉

稱於春花尚無妨礙但查米價未免稍昂

臣

等會

商檄行布政使張元懷酌議平糶照督

臣

李衛向

例於省城內外分設糶廠四所各委文武官二員

量撥倉穀照時減價平糶至於通省各屬亦皆據

詳平糶已飭令遵照每年存七糶三之例多設廠

所分委佐雜各員量為減價出糶以廣民食其嘉

興府屬七縣上年偶被蟲傷內平湖海鹽二縣較
為稍甚目下雖俱遵照定例飭將倉穀平糶恐將
來或有不敷臣等再加酌量變通陸續平糶如有
細戶小民無力插種者現在飭查量為資助工本
之需務俾民食接濟不致缺乏臣等謹具摺

奏明伏祈

皇上睿鑒施行謹

奏

覽奏知道了王國棟署理撫篆安望浙省地方雨暘時
若耶

署理浙江巡撫印務

臣

王國棟謹

奏為恭謝

聖訓事雍正十年二月十八日接准督

臣

李衛寄信內

開雍正十年二月十一日奉

上諭杭州各官正月初一日拜牌時向例鋪毯三條署
總督李燦因王國棟退縮在二班地上行禮李燦即

金方日人八二
卷六下
手提毬子轉身親遞與王國棟接取朝賀有關大典
二人甚屬失體孫國璽在傍不敢入班且聞李燦署
理總督印務以來諸事急遽無序舉動多有未協之
處王國棟軟弱游移可寄信回去著實嚴加申飭欽
此謹遵

旨寄信前來當凜遵

聖訓改革前錯警惕勉勵嗣後諸事俱宜按照輕重緩
急加意詳慎辦理毋致貽誤為要等因到
臣臣跪

讀

諭旨感激悚惶愧悔無地荷蒙

天恩不加譴責僅

命督臣李衛傳

旨申飭臣惟有敬凜遵奉益加警惕諸事詳慎辦理將
錯誤之處痛自勉勵悛改以期仰副

弘仁於萬一為此繕摺

聖訓伏祈

皇太后覽謹

奏

勉勵後政與否朕實難憑信

署理浙江總督臣李燦署理浙江巡撫臣王國棟

謹

奏為恭報海塘秋汛平穩及田禾情形仰祈

睿鑒事竊查浙省海塘關係地方民生最為重大而潮汛至秋更屬緊要本年七月十五六兩日適遇風

潮猛烈工程在在險迫臣等親率工員實力防護
已保平穩至八月十七八等日正值大汛潮頭較
七月望汛更大臣等預飭在工各員多備料物人
夫晝夜防守隨坍隨築又兼新築草塘日夕趨工
將次告竣得資捍禦幸保無虞今九月初汛已過
霜降以後將屆立冬潮汛自可平緩合將秋汛情
形繕摺奏

聞再查浙省各屬田禾被蟲先經臣等具摺

奏明茲據委員先後回省覆稱各屬業已淨盡消除

惟諸暨景寧海鹽平湖等數縣內有低窪之田被

傷稍重臣等已飭動備公銀兩酌量賑恤外再湖

屬之安吉州因七月十五六兩日大雨山水驟發

近山最低之田浸壞者約有一萬餘畝又烏程歸

安二縣暨嘉屬之桐鄉縣各稟報於本月初九日

有數鄉忽雨冰雹臣等查禾苗將屆成熟之時不

無損傷即檄行布政司星飛委員確勘被傷處所

酌量辦理其寧郡被颶風之定鎮慈象等縣近海
田禾收成少減恐將來米價騰貴現在預為籌畫
於產米之地買運接濟至此外各屬禾稻情形據
各府縣申報中稻現在登場晚稻俱盛長結實時
近刈穫天氣晴明秋成不致歉薄合併奏


聞伏乞

皇上睿鑒施行謹

奏

王國棟署撫篆似此等災異乃

上天慈恩薄罰耳



硃批諭旨卷六十下